

3 SAN JUAN

Juan, Gayo wāikuguyamarē gojadea

¹Yū buḡuro, murē Gayore diayeta yū maīgūrē i pūrē gojāa.

²Ire gojāa murē yū maīgūrē. Yū mūya āārīburire Marīpure sērēbosāa. Mū Marīpu merā oārō āārīrōsūta āārīpereri mūyare oārō waaburire, pūrīri marīrō merā mū āārīburire sērēbosāa. ³Gajirā Jesúre buremurā yū pūro ejarā, mū āārīrikurire yare werema. “Jesúyare irinīgū, i diayema āārīrīrē iriwāgāgū yāmi”, āri werema. Īgūsā irire weremakū pégu, buro usuyāa. ⁴Jesúre buremurā yū buerā Īgūya diayema āārīrīrē irinīrā yāma, ārīri kerere pégu, usuyataria. Yū i kerere péri, āārīpereri gaji nemorō yare usuyamakū yāa.

⁵Mū Jesúre buremurārē oārō iritamunīgū iriayuro. Gajiro marā mū iāmasimerā āārīkeremakū, Īgūsārē oārō iritamugū iriayuro. ⁶Īgūsā guare, Jesúre buremurā nerēnarōgue gajirārē mū maīrīrē werema. Irasirigu, Īgūsā mū pūrogu ejarārē Īgūsā gajirogu oārō waaburire iritamuka! Mū Īgūsārē iritamugū, oārō irigukoa. Marīpu marīrē irasirimakūta gāamemi. ⁷Īgūsā Jesucristoya kerere werewāgārā, Jesúre buremumerārē: “Guare iritamuka!” neō āri sērēbema. ⁸Irasirirā marī Jesúre buremurā Īgūsārē iritamurō gāamea. Īgūsārē iritamurā, marī Īgūsā merā moārā yāa, gajirā Jesúya diayema āārīrīrē péburo, ārīrā.

Diótreres ñerō irideare gojadea

⁹Yū musārē Jesúre buremurā irogu āārīrārē su pū gojabū.

Diótreres gapū musārē doreduagu āārīsīā, gua musārē: “Āsū irika!” āri weredeare péduabirayupu. ¹⁰Yū musā pūrogu waagú, Īgūrē musā péurogu Īgū irideare: Īgū guare ñerō kere ārideare, Īgū ārikatodeare weregura. Īgū i ditare iribirayupu. Jesúya kerere wererā waagorenarārē bokatīrīñeābirayupu. Gajirā musā merāmarā Īgūsārē bokatīrīñeāduamakū Īgū: “Bokatīrīñeābirikōōka!” ārayupu. Īgūsārē bokatīrīñeārē Jesúre buremurā nerēnarōgue ñajādorebirayupu.

¹¹Mū, yū maīgū, ñerō irirārē Īkūībirikōōka! Oārō irirā gapure Īkūīka! Oārīrē irirā Marīpuyarā āārīma. Ñerīrē irirā gapū Marīpure masībema.

Demetrio oārō irideare gojadea

¹²Āārīpererā: “Demetrio oāgū āārīmi”, ārīma. Irasirirā masaka Īgū iririre iārā: “Marīpu dorederosūta Jesúyare yāmi”, ārīma. Guade: “Īgū oārō irigu āārīmi”, ārā. Musā masīa. Gua diayeta werea.

Juan Gayore gojatūnudea

¹³Yū gaji wāri murē wereduakeregu, i pūguere gojabirikoa. ¹⁴Mérōgā puru murē Īgū waadukoa. Irasirigu mū pūrogu waagú, mū merā werenigukoa.

¹⁵Oārō siñajārī opaka! Oō marā marī merāmarā Jesúre buremurā murē oādorema. Āārīpererā irogu āārīrā marī merāmarā oāburo.

Iropata āārā.

Juan